

四庫全書

子部

欽定四庫全書

山堂肆考卷一百三十三 明 彭大翼 撰

字學

書法

揚子曰書心畫也心畫形君子小人見矣說文依類
象形之謂文形聲相益之謂字著於竹帛之謂書

取夬

周易上古結繩以治後代聖人易之以書契蓋取諸夬

效奎

孝經援神契奎主文章蒼頡效象宋均注奎星屈曲象
鉤有似文字之畫

龍藏

史記蒼頡黃帝下臣觀鳥跡象之以作文字鬼夜哭龍
潛藏注云謂有文字恐人書故鬼哭龍藏也

兔哭

淮南子曰蒼頡造書而天雨粟鬼夜哭注云自書契作

詐偽萌生去本趨末天知其將餓故為雨粟鬼恐為人
所劾故哭鬼一作兔兔恐有取毫作筆之害故哭

六書

伏羲氏命朱襄氏造六書周禮保氏以六書教國子一
曰象形二曰指事三曰諧聲四曰會意五曰轉注六曰
假借

八體

自蒼頡以降書凡五變曰古文曰籀曰篆曰隸曰草秦

燒焚先典廢古文更用八體一曰大篆周宣王時史籀取蒼頡形意損益古文為大篆十五篇以其名顯故謂之籀書以其官名故謂之史書以別小篆故謂之大篆今之石鼓文是也二曰小篆秦始皇時李斯省篆籀之文著蒼頡篇九章本曰秦篆世謂之玉筋篆又謂之八分小篆大篆小篆皆簡冊所用也三曰刻符其形鳥首雲脚用題印璽也四曰蟲鳥之形施於幡信也又曰傳信鳥跡書五曰摹印屈曲其體施於印章也亦曰繚篆

六曰署書宮殿題署是也蕭何作未央殿成用秃筆題額時謂之蕭籀七曰爰書銘於爰也爰體八觚隨其勢而書之又曰文記笏武記爰因而製之銘也八曰隸書秦程邈以文牘繁多難於用篆因減小篆取便於隸佐故謂之隸書亦曰佐書秦之權量所刻是也

八分

八分書漢時上谷王次仲增廣隸書為之蓋起於官獄多事苟趨易簡故無點畫俯仰之文一說書有八體蔡

伯喈於八體之後又分此法故云八分又蔡琰文姬嘗言臣父八分書割程隸字八分取二分割李小篆二分取八分故云八分又曰皆似八字勢有偃波大抵比秦隸則易識比漢隸則類篆以篆筆作漢隸即得之

五合

凡書有五合神怡務閒一合也感物徇知二合也時和氣潤三合也紙墨相發四合也偶然欲書五合也反是則乖矣

三品

張懷瓘書斷書有十體其優劣之差為神妙能三品居神品者二十五妙品者九十有八能品者一百有七又書訣墨數張旭草書入神品八分入妙品隸入能品

三具

書斷魏韋誕字仲將諸書並善鄴都宮觀始成詔仲將題署御給筆墨皆不任用因奏言若用張芝筆左伯紙臣墨兼此三具又得臣手然後可以逞徑丈之勢方寸

千言

鶴頭

蕭子良古今篆隸文體有葉書楷書蓬書懸針書垂露書飛白書填書草書雁書虎爪書偃波書鶴頭書象形篆尚方大篆鳳鳥書科斗蟲書龍虎書仙人書芝英書十二時書倒薤書龜書麒麟書金錯書蚊脚書凡數十種皆出於六文八體之書而因事生變者也按鶴頭書謂髣髴鶴頭也漢初詔版所用謂之尺一簡

龍爪

王羲之遊天台還會稽上洞庭題柱為一飛字有龍爪形後遂有龍爪書又顏真卿書如螭頭馬尾

麒麟書

孔子弟子感麒麟作麒麟書

花草書

花草書始於齊武帝觀落英茂木為之

不以意叅

凡字之體不能齊一如東字之長西字之短口字之小體字之大朋字之斜黨字之正千字之疎萬字之密畫多者宜瘦少者宜肥魏晉書法之高良由各盡字之真態不以私意參之耳

皆由悟入

古人書法皆由悟入若長史之觀舞劒韋公之錐畫沙是也

科斗

高陽氏作科斗書

鐘鼎

大禹作鐘鼎書

鋒銳圭角

凡用筆不欲太肥肥則形濁不欲太瘦瘦則形枯不欲
多露鋒銳露鋒銳則意不持重不欲深藏圭角藏圭角
則體不精神

形質性情

凡真書以點畫為形質使轉為性情草書以點畫為性情使轉為形質縱橫牽掣謂之使鈎環盤紆謂之轉向背得宜謂之點畫

疎瘦拘束

王獻之字勢疎瘦如隆冬之枯樹拘束如嚴家之餓隸其枯樹雖槎枿而無屈伸其餓隸雖飢羸而不放縱

勁健肥厚

東軒筆錄唐初字學勁健得晉宋風開元後變為肥厚

元和中沈柳之徒復尚清勁五代楊凝式國初李建中
妙絕一時行草亦主肥厚李昌式不免於重濁山谷嘗
論三家法以為楊少師如散僧入聖李西臺如法師參
禪王著如小禪縛律

詳雅綿密

夫書貴注意詳雅起發綿密一字須數體俱入一紙須
字字意殊若紙強筆弱筆弱紙強強弱不等則蹉跌矣
飄揚嚴重

東坡題細字蓮花經真書難於飄揚草書難於嚴重大
字難於結密而無間小字難於寬綽而有餘今君所藏
抑又可怪卷之盈握沙界已周讀未終篇目力皆廢乃
知蝸牛之角可戰蠻觸棘刺之端可刺沐猴嗟嘆之餘
聊題其末

心正氣和

凡書在心正氣和心不正筆則欹斜氣不和書必顛仆

掌虛指實

用筆之法指實則筋力均平掌虛則運用便易黃山谷
云學書欲先知用筆用筆之法欲雙鉤迴腕掌虛指實
以無名指倚筆則有力

姿儀雅麗

郭忠恕書法苑李嗣真論右軍書格不同書樂毅論太
史箴體皆正直有忠臣烈士之象告誓文曹娥碑其容
憔悴有孝子順孫之象逍遙篇孤雁賦迹遠趣高有拔
俗抱素之象畫像贊洛神賦姿儀雅麗有矜莊嚴肅之

象皆見義以成字非得意以獨研者也

骨氣深穩

東坡集永禪師書骨氣深穩體兼衆妙如觀陶彭澤詩
初若散緩不收反復不已乃識奇趣

宜相附麗

書有附麗之法謂字之形體有宜相附近者不可相離
如形影飛赴起枝飲勉之類凡有文欠之旁者以小附
大以少附多是也

宜先筋骨

凡初學書者宜先筋骨筋骨未立肉何所依故曰多力豐筋者聖無力無筋者病又曰稜骨者書之弊薄也脂肉者書之滓穢也字有態度心之暢也

應副相稱

書有應副之法謂字之點畫疎者彼此映帶故必得應副相稱而後可如龍詩儼轉之類必一畫對一畫相應又相副也

姿態橫生

張欽夫跋東坡帖坡公結字穩密姿態橫生一字落紙
固可寶玩而況平生大節如此哉

傳寶百世

宋張安國跋山谷帖豫章先生孝友文章師表一世咳
唾之珠聞者興起況其書又入神品宜其傳寶百世

自成一家

湖山小錄宋陳堯佐變古之法自成一家雖點畫肥重

而筆力勁健為方丈字謂之堆墨八分

促小放大

說文大字促令小小字放使大自然寬綽得所又曰橫則如長舟之截小渚直則如春笋之抽寒谷

離方遁圓

書斷魏初有鍾胡二家為行書法盛行於世行書即正書之小變又云非草非真離方遁圓兼真者謂之真行帶草者謂之草行

漢試吏

漢初以六體書試吏一曰古文二曰奇字三曰篆書四曰隸書五曰繆篆六曰蟲書又王莽使甄豐校文字部改定古文為六書

唐取士

唐人以書判取士故士大夫字畫勻整齊密類有科舉氣習顏魯公干祿字書是其證也

小心布置

字形在紙筆法在手筆意在心小心布置大膽落筆

銳情臨倣

唐貞觀永徽中虞世南褚遂良以書專門薛稷外祖魏徵家多藏虞褚書故稷銳情臨倣結體遒麗遂以書名天下

不擇紙筆

褚遂良嘗問虞世南曰吾書何如智永答曰吾聞彼一字直五萬君豈得比又問孰與歐陽詢曰吾聞詢不擇

紙筆皆得如意君豈得比遂良曰然則何如世南曰君若手和墨調足可貴尚遂良大喜

不盡臨摹

初學之士所貴臨摹者蓋節度其手易於成就耳對書謂之臨覆書謂之摹夫臨書易失古人位置而多得古人筆意摹書易失古人筆意而多得古人位置故臨書易進摹書易忘至黃山谷又云古人學書不盡臨摹惟多張古人法書於壁間觀之入神則下筆時筆隨人意

矣

筆趣欲飛

蕭引字叔休善書為時所重陳宣帝嘗批奏事指引署名曰此字筆趣翩翩似鳥之欲飛引謝曰此乃陛下假其毛羽耳

筆跡遂妙

蔡有鄰濟陽人善八分書始猶拙弱至天寶中遂精妙湘衛間多其筆跡

枕中竊訣

羊欣筆陣圖王羲之年十二見前代筆訣於父枕中竊而讀之父因與之不旬日書便大進

被中畫腹

王紹宗工草隸嘗與人書曰鄙夫書無工者將由水墨積習耳當精心率意虛神空思以取之吳中陸大夫常以余比虞世南以不臨寫故也聞世南被中畫腹與余正同

家雞野鷺

晉庾翼字稚恭少時與王右軍齊名右軍後進內外崇重翼大不平在荊州與都下人書云小兒輩厭家雞學野鷺皆學右軍書或云庾征西初不服逸少有家雞野鷺之論後以為伯英復生

怒猊渴驥

唐徐浩嘗書四十幅於屏八體皆滿世狀其法如怒猊抉石渴驥奔泉

如百鈞弩

志林魏鍾繇弟子宋翼每畫一波三折筆作一戈如百鈞弩作一點如高峯墜石作一牽如百歲枯藤作一放縱如驚蛇入草此三折筆法也

如五朵雲

見寵妾

仲將懸櫬

晉太元中新成太極殿謝安欲使王獻之題榜而難言

之試以韋仲將懸撓題榜語之獻之揣知其旨正色曰
仲將魏之大臣寧有此事使其若此有以知魏德之不
長安遂不之逼按魏明帝立凌雲觀悞先釘榜以籠盛
韋誕輓轡引上書之去地二十五丈既下鬚鬢皓然還
語子弟宜絕此法

子雲停舟

梁書蕭子雲出為東陽太守百濟國使人至建業求書
逢子雲維舟將發使人於渚側候之子雲遣問答曰侍

中尺牘之美遠流海外今日所求惟在名跡子雲乃為
停舟三日書三十紙與之獲金貨數百萬子雲性恹自
非答餉不書好事者重加賂遺以要其答

李衛流涕

羊欣筆陣圖王羲之學李衛夫人書夫人見其書流涕
曰此子必蔽吾名墨數云羲之初學李衛夫人書及渡
江北見李斯等書之許見鍾繇梁鵠書之洛見蔡邕書
又見張岳碑始知學衛夫人書徒費日月按李衛夫人

者本姓衛乃尚書郎李充母故自稱李衛

鍾繇椎胸

韋續墨藪鍾繇見蔡邕筆法椎胸三日因以嘔血一作
繇見韋仲將筆法於仲將座上椎胸三日

印泥畫沙

墨藪唐張長史旭與褚河南論書曰凡用筆當如印印
泥如錐畫沙初不悟其意後於江岸以錐畫沙始信長
史之言貴藏鋒也

遊天戲海

書斷鍾繇書如雲鵠遊天羣鵠戲海王羲之書如龍跳
天門虎臥鳳闕張芝書如漢武好道憑虛欲仙蔡邕書
骨氣洞達如有神助蕭子雲書如危風阻日孤松一枝
羊欣書如大家婢為夫人舉止羞澁終不似真王獻之
書如河間少年皆悉先悅索靖書如飄風忽舉鵞鳥乍
飛王僧虔書如王謝子弟縱不端正然爽爽有一種風
味袁松書如深山道士見人便退縮

羲之書几

王羲之嘗詣門生家見華几滑淨因書之真草相半後其父刮去之門生驚懊累日

獻之書裙

羊欣字敬元父不疑為烏程令欣時年十二王獻之為吳興守甚知愛之獻之嘗夏月入縣欣著新練裙晝寢獻之書數幅而去欣本攻書因此彌善

題會稽紙

庾翼家有王右軍書每紙背翼題云王會稽六紙故劉
禹錫寄柳子厚詩書成欲寄庾安西紙背應勞手自題
聞道近來諸子弟臨池尋已厭家雞

印貞觀字

唐太宗求書凡得王羲之真行二百九十紙以貞觀字
為印其草迹命褚遂良楷書小字以影之開元五年玄
宗又書開元字為印

為道士寫經

山陰道士好養鵝王羲之往觀焉意甚悅因求市道士云為我寫道德經當舉羣相贈羲之寫畢籠鵝而去

為老媪書扇

王羲之在會稽山見一老妪持十許六角竹扇羲之因書扇各作五字妪初有愠色羲之語妪曰道是王右軍字可索百錢妪如其言人競買之他日妪又持扇來請書羲之笑而不答

元和脚

柳子厚酬劉禹錫家雞之贈日月臨池弄小雛還思寫
字付官奴柳家新樣元和脚且盡薑牙斂手徒柳家謂
柳公權也公權在元和中甚有書名元和脚者言公權
字變新樣而脚則元和也

元祐脚

宋陳後山詩集徐清字靜之蓬萊女官也下西里王氏
詩效謝體書效黃魯直妍妙可喜陳後山詩蓬萊仙子
補天手筆妙詩清萬世功肯學黃家元祐脚信知人厄

匪天窮黃山谷在元祐中有書名

傳智永法

虞世南同郡釋智永乃王右軍七代孫其第五子徽之
之後也善學右軍書所居吳興學處積有禿筆十八甕
世南因而師焉究極其法為世祕受

變右軍體

唐歐陽詢字信本潭州人初學王羲之書後漸變王體
筆力險勁為一時之絕高麗嘗遣使求之高祖嘆曰不

意詢之書名播於夷狄彼觀其書謂其容貌魁梧耶按
詢形體么麼故上云又詢子通早孤母徐教以父書使
希父跡數年大進父子齊名號大小歐陽體

鑿垣貯書

唐王涯居永寧里蓄名書畫以金玉為匣軸鑿垣貯之重
複固秘及被誅為人破垣剔取金玉而棄其書

發墻取書

筆談舊傳樂毅論乃羲之親書於石唐太宗聚二王墨

迹惟樂毅論石本在其後隨太宗入昭陵朱梁時耀州節度使發昭陵得之復傳人間或云太平公主以偽本易之不曾入塋

玉匣藏書

尚書故實唐太宗有大王真跡三千六百紙率以一二尺為軸寶惜者蘭亭序為最嘗附耳語高宗曰吾千秋萬歲後與吾蘭亭序將去遂以玉匣貯藏昭陵後為郭崇韜所發復入人間

織袋盛書

法書苑太平公主愛王右軍所書樂毅論則天與之以
織袋盛置箱中及籍沒咸陽老姬竊去縣吏搜取姬驚
懼投之竈下

紙田墨稼

劉氏小說蔡洪赴洛人問吳中舊業答曰紙為良田筆
為鉏耒墨為稼穡義理為豐年

筆刀硯城

王羲之題李衛夫人筆陣圖夫紙者陣也筆者刀稍也
墨者鏖甲也水硯者城池也本領者將軍也心意者將
副也結構者謀畫也颺筆者吉凶也出入者號令也屈
折者殺戮也欲學書者先乾研墨凝神靜思預想字形
大小偃仰平直振動令筋脈相連意在筆前然後作字
若平直相似狀如算子便不是書但得點畫耳

筆意灑落

宋范至能跋司馬溫公帖世傳字書似其為人亦不必

皆然杜正獻之嚴整而好作草聖王文正之沈毅而筆
意灑落敬側有態豈皆似其人哉惟溫公則幾耳開卷
儼然使人加敬邪僻之心都盡而況於親炙之者乎

字體新麗

東坡跋歐陽文忠公書筆勢險勁字體新麗自成一家
朱元晦跋云公作字如其為文外若優游中實剛勁惟
觀其深者得之

郎君遺賣

劉賓客嘉話王內史借船帖書之尤工者也盧尚書公
實愛有年矣有張姓者致書借之不得云只可就觀未
嘗借人後盧公除潞州旌節在途纔數程忽有人將書
帖就公求售閱之乃借船帖也公驚異問之云盧家郎
君要錢遣賣耳公嗟訝移時不問其價

外甥相求

東坡因柳氏二外甥求筆跡作詩云文筆如山未足珍
讀書萬卷始通神君家自有元和脚莫厭家雞更問人

君謨態度

宋蔡襄字君謨山谷題其書云君謨書如蔡琰胡笳十八拍雖清壯頓挫時有閨房態度張欽夫跋云端明書如禮法之士盛服齊居不敢少有舒肆之意見者自是起敬

曼卿筋骨

范文正公祭石曼卿文曼卿之筆顏筋柳骨散落人間為人寶物按顏謂真卿柳謂公權

好荆公書

朱元晦云先君子自少好學荆公書家藏遺墨數紙其詐作者率能辨之

愛米公書

宋米芾字元章少負英聲前輩巨公皆器重之東坡尺牘云嶺海八年念吾元章邁往凌雲之氣清雅拔俗之文超邁入神之字何時見之以洗瘴毒今真見之矣高宗天縱日躋雲章洛畫獨愛元章平生篆隸真行草書

分為十卷刻於石稱其書如風檣陣馬沈著痛快當與
鍾王抗衡朱元晦跋米帖云米老書如天馬脫銜追風
逐電雖不可範以馳驟之節要自不妨痛快子友仁字
元暉文詞書畫深得家法

親書大字

朱子語錄石曼卿有詩云仁者雖無敵王師却有征無
私乃時雨不殺是天聲某舊嘗見曼卿親書此詩大字
氣象方嚴筆力遒勁極可寶愛

善寫細字

江南野史應用善書細字微如毛髮嘗於一錢上寫心經粒麻上寫國泰民安四字

文淵欲學伯高

東坡題陳隱居書後陳公密出其祖隱居先生之書相示某聞之學蔡君謨先生之書如三公被袞冕立玉墀之上某亦以為學先生之書如馬文淵所謂願學龍伯高之為人也

李密未見秦王

宋楊廷秀跋米元章登峴大字帖某學書最晚雖徧參諸方然袖中一瓣香五十年未拈出也今得見米禮部登峴二大字乃知李密未見秦王耳

楷書

漢上谷王次仲始作楷書

王羲之八法

法書苑王逸少工書十五年徧工永字以其八法之勢

能通一切字也八法謂側勒弩趯策掠啄磔是也

歐陽詢八訣

唐歐陽詢八訣謂、如高峯之墜石、如長空之新月、
一若千里之陣雲、一若萬歲之枯藤、一如嶺松倒折落、
掛石崖、一如萬鈞之弩發、一如利劍截斷之角、一如一波常三過筆

筆迹雄強

仇池筆談五代楊凝式筆迹雄強往往與顏行相上下

世多稱李建中宋宣獻二人書不知宋寒李俗殆浪得名耳惟蔡君謨資格既高當為本朝第一

點畫遒勁

澠水燕談錢若水言唐陸希聲得筆法凡五字撇押鉤格抵是也用筆雙鉤則點畫遒勁而盡妙矣謂之撥鐙法希聲以授沙門詵光光入長安為翰林供奉又宰相刁術言江南後主得此法復增二字曰導送今待詔尹希古亦得之而所書為一時之妙

度越諸家

黃山谷集張長史郎官廳壁記唐人正書無出其右所以度越諸家無轍跡可尋可謂入筆墨三昧

獨步當世

澠水燕談近年筆法蔡君謨獨步當世余嘗戲謂君謨言學書如沂急流用盡氣力船不離處所君謨以為能取譬

書得於心

筆談書之神運雖得之於心然法度必資講學凡字須要均平若筆畫多寡相遠不可使停寡在左則取上齊吟字是也寡在右則取下齊知字是也

書稱其貌

志林歐陽詢貌寒微敏悟過人其書勁險厲正稱其貌耳是知凡書象其為人

多肉微骨

墨數王逸少曰凡字多肉微骨謂之墨猪

又手並脚

筆錄李後主云顏魯公書端勁有法而無佳處正如又手並脚田舍漢耳

草書

漢元帝黃門令史游為急就章一篇解散隸體簡畧書之照隸之規矩存字之梗概漢俗所尚遂以流傳本草創之義謂之行草欲取篇名以別今草故謂之章草或謂章帝時杜操崔瑗崔實皆稱工書帝愛其

書令上表亦作草故曰章草張伯英之法謂之草書
衛瓘復采伯英之法兼乎行書謂之藁草羲獻之書
謂之今草構結微眇者謂之小草復有所謂遊絲之
草宋蔡襄為飛草謂之散草劉德昇因隸法掃地而
真幾於拘草幾於放故小變其法不真不草謂之行
書兼真謂之真行帶草謂之草行郭忠恕法書苑凡
章草小草點畫皆有法不可率意輒書諺云信速不
及草書家貧不辦素食言其難卒置也故伯英下筆

必為楷則曰匆匆不暇草書然東坡志林則曰真生行行生草真如立行如行草如走未有未能立而能行未能行而能走者也

草聖

東漢張芝字伯英臨池學書池水盡黑家中衣帛必先書而後染練韋仲將謂之草聖又伯英草書氣脈通連隔行不斷謂之一筆書孔敬通亦善草書惟一筆一行而已

草賢

談苑東漢崔瑗字子玉駟之子善章草謂之草賢

伯英十紙

王羲之以章草答庾翼翼嘆服曰吾昔有伯英章草十紙後失之今見王書神明頓還舊觀

公權三番

唐柳公權字誠懸嘗召至御前書紙三番作真草行之體文宗嘗與公權聯句帝命題辟字徑率五寸帝曰鍾

王無以尚也

衛恒四體

晉衛恒瓘之子工草隸為四體書

懷素三昧

國史補唐長沙僧懷素自言得草聖三昧

得筋得骨

晉衛瓘字伯玉索靖字幼安俱為尚書郎俱善草書人號一臺二妙二人皆學張伯英書瓘得英之筋靖得英

之骨

工瘦工肥

南昌集懷素草工瘦張長史草工肥瘦硬易作肥勁難
工又鍾繇與胡昭並師劉德升草書世傳胡肥鍾瘦

取燥取險

凡作楷墨欲乾不可太燥行草則燥潤相兼以潤取妍
以燥取險墨濃則筆滯滯則筆枯

得法得神

唐張旭蘇州人善草書嗜酒每大醉呼叫狂走乃下筆或以頭濡墨而書既醒自以為神不可復得世號張顛嘗自言始見公主擔夫爭道及聞鼓吹而得筆法又觀公孫大娘舞劍器而得其神後人論書得其法者惟崔邈顏真卿云東坡志林古人書法皆有所自張長史言觀舞劍器而得神雷大簡言聽江聲而筆法進文與可亦言見蛇鬪而草書長殆非誣也

風送雲收

法書苑張旭草書如孤蓬自振驚沙坐飛鄭虔草書如
風送雲收霞催月上釋亞棲草書如飛鳥出林驚蛇入
草

烟霏霧結

王逸少草書之妙煙霏霧結狀若斷而還連鳳翥龍盤
狀如斜而反正

老人陳牒

張旭為常熟尉有老人陳牒乞判宿昔又來旭怒其煩

老人曰觀公筆勢奇妙欲以家藏耳因問所藏書老人
出其父所藏旭視之嘆曰天下奇筆也自是盡其法

寒士致簡

有寒士與張旭為鄰數致簡得其報章遂驚於市因以
致富

筆法驚龍

羲之善草隸論者稱其筆法飄若游雲矯若驚龍

筆鋒殺兔

李白草書歌行少年上人號懷素草書天下稱獨步墨池飛出北溟魚筆鋒殺盡中山兔

將以暢志

陸羽擬懷素傳懷素疎放不拘細行飲酒以養性草書以暢志酒酣興發遇寺壁里牆靡不書之貧無紙乃種蕉葉萬株以供揮灑

俱得傳名

釋亞棲善草書自云凡書通即變王變子雲體歐變右

軍體柳變歐陽體智永禪師褚遂良顏真卿李邕虞世
南等並得中書法後皆自變其體俱得傳名若執法不
變號為書奴

春蚓秋蛇

梁蕭子雲擅名江表僅得成書無丈夫之氣行行若縈
春蚓字字如縮秋蛇臥王蒙於紙中坐徐偃於筆下禿
千兔之翰無一毫之筋窮萬谷之波無半分之骨以茲
播美非濫名耶

旱蛟覓兔

歐陽詢貞元初為太子率更令嘗書千文周越題云所謂如旱蛟得水覓兔走穴信不虛耶

一筆環寫百字

唐呂向字子回工草書能一筆環寫百字若縈髮然世號連綿書

一紙令書八字

談苑翰林院自五代以來字勢輕弱筆體無法太宗即

賜筆札求善書許自言首得蜀人王著即召為侍書著
善草隸獨步一時初以紙一番令書八字又令書六字
至一字皆極道勁自是書體一變粲然可觀

前緩後急

凡草書下筆之始須藏鋒轉腕前緩後急形勢體狀如
龍如蛇意相鉤連莫令間斷仍須簡畧為上不貴煩冗
左規右矩

黃山谷與党伯舟書大概楷法欲如快馬斫陣草法欲

左規右矩此古人妙處也

頗自矜夸

三輔決錄趙襲為燉煌太守先是杜伯度崔子玉以工草稱於前世襲與羅暉亦以能草頗自矜夸故張伯英與襲同郡太僕朱賜書曰上比崔杜不足下方羅趙有餘按伯度操字子玉瑗字趙襲字元嗣羅暉字叔景

各有變態

凡草書之體如人坐臥行立揖遜忿爭乘舟躍馬歌舞

擗踊一切變態各有義理不可忽也

以意傳薛稷

唐魏徵子叔瑜善草隸以筆意傳子華及甥薛稷世稱善書者前有虞褚後有薛魏

以書問東坡

東坡志林劉十五論李十八草書謂之鸚哥嬌蓋謂鸚鵡能言不過數句而已後十八書稍進問僕曰比舊日何如僕答曰可作秦吉了矣然僕此言有公在乾侯之

意

龜龍所見

趙壹非草書云草聖之興上非天象所出下非河洛所吐中非聖人所造蓋秦末官書煩冗羽檄分飛故為隸草趣急速耳今之學者不思其簡易之指直以為崔杜之法龜龍所見也鑽堅仰高忘其罷勞夕不遑息是不暇食十日一筆月數丸墨領袖如皁唇齒常黑然其為字無益工拙亦效顰者之憎醜學步者之失節也

江山所助

黃山谷自作草聖後余居開元寺之怡僊堂坐見江山
此中作草似得江山之助

不治他技

韓愈送高閑上人序往時張旭善草書不治他技喜怒
窘窮憂悲愉佚怨恨思慕酣醉無聊不平有動於心必
於草書發之故其書變動猶鬼神不可端倪以此終其
身而名後世今閑之於草書有旭之心哉

不踐古人

東坡評草書古人云匆匆不及草書此語非是若匆匆不及是平時有意於學此弊之極遂至於周越仲翼無足怪也吾書雖不甚精然自出新意不踐古人是一快也

筆迹雄傑

楊風子善草書筆迹雄傑有二王顏柳之風以心疾致仕人號楊風子

筆法俊快

東軒筆錄本朝尚書郎周越以書名天聖景祐間然筆法軟俗無古氣梅堯臣作詩閑淡無味時蘇舜欽喜為健句而草書尤工嘗曰吾不幸寫字為人比周越作詩為人比梅堯臣良可嘆也

篆書

衛恒四體書勢兩漢銘勒雜以古文篆籀及八分為之魏晉以還篆文遂盛郭忠恕法書苑曰自小篆散

而八分生八分破而隸書出隸書悖而行書作行書
往而草書聖自隸以下吾不欲觀

龜文龍鱗

雜記體有六篆巧妙入神或象龜文或比龍鱗紆體放
尾長翅短身揚波震激鷹跼鸞停

釵頭鼎足

法書苑寶泉小篆贊曰釵頭屈玉鼎足垂金

變科斗文

史記周宣王時史籀變科斗文以為大篆李斯變蒼頡篇取籀省文謂之小篆

得螭匾法

湘山野錄江南徐騎省鉉善小篆映日視之畫之中心有一縷濃墨正當其中乃筆鋒直下不倒嘗在畫中耳鉉嘗自謂吾晚年始得螭匾法凡小篆喜瘦而長螭匾法非老筆不能按篆法匾者謂之螭匾徐鉉稱為老手石鼓文是也韓愈有石鼓歌歐陽永叔有跋石鼓文

象形

剪刀篆韋誕所作象其形也

垂脚

小篆俗皆喜長太長則無法但以方楷一字半為度一字為正體半字為垂脚脚不過三凡有三脚當以正脚為主餘畧收短如旛脚可也若生甘之等字卻以上出為脚如草木之為物正生則上出枝倒懸則下出枝耳

本於務光

薤葉篆曹喜本務光之法垂枝濃直以小篆書之按務光堯時人嘗作倒薤之書

始於衛瓘

柳葉篆始於晉衛瓘

書章表

垂露篆點綴輕盈象露之垂曹喜以書章表

觀星象

瓔珞篆始於劉德升觀星象為之

方圓流峙

唐李陽冰上李大夫論古篆陽冰志在古篆殆三十年
想見前人遺跡美則美矣惜其未有點畫但偏旁模刻
而已乃復仰觀俯察六合之際於天地山川得方圓流
峙之形於日月星辰得經緯昭回之度於雲霞草木得
霏布滋蔓之容於衣冠人物得揖遜周旋之體於鬚眉
口鼻得喜怒慘舒之分於蟲魚禽獸得屈伸飛動之理
於骨角齒牙得擺拉咀嚼之勢

勁健端妙

法書苑釋無惑同安人為翰林待詔善小篆勁健端妙
士大夫藏以為寶徐鉉鄭文寶查道高紳等皆江東人
雖稱善篆弗能及也

玉筋

唐舒元興篆志秦李斯變蒼頡籀文為玉筋篆成一家
法式歷兩漢三國至隋更八姓無有出其右者趙郡李
氏子陽冰生皇唐開元天子時獨能窮入篆室隔一千

年而與李斯相見其格峻其力猛天以字寶瑞吾唐矣
又陽冰篆字人不能及號書中虎又號筆虎

金剪

續仙傳唐司馬承禎字子微善篆書別為一體號金剪
書

隸書

秦下邳人程邈字元岑為縣獄吏得罪始皇幽繫雲
陽獄中在獄覃思十年易小篆為隸書三千字奏之

始皇大喜免其罪用為御史

竹簡寫尚書

尚書序魯共王壞孔子舊宅于壁中得先人所藏古文
虞夏商周之書皆科斗文字時人無能知者乃為隸文
更以竹簡書之

絹素寫文選

唐裴行儉工草隸中宗嘗給絹素詔寫文選祕愛其法
行儉每曰褚遂良非精筆佳墨未嘗輒書不擇筆墨而

妍捷者唯余與虞世南耳

刻蔡邕書

漢靈帝命蔡邕為古文篆隸書刻於石碑碑始立觀視及模寫者車千餘輛擁塞街巷

變右軍法

王獻之善隸書變右軍法為今體字畫秀媚妙絕時倫與父俱得名其章草疎弱殊不及父有問羲之云世論卿書不逮獻之答曰殊不爾也他日見獻之問尊君書

何如獻之不答論者曰君固當不如獻之笑而不答曰人那得知也

逼真世南

法書苑唐太宗學虞世南隸書每難於戈法一日書戠字召世南補寫其戈以示魏徵曰朕學世南書似盡其法卿看之徵曰天筆所臨萬象不能逃其形非臣所可擬抑觀聖作惟戠字戈法逼真上深嘆其藻識

超踰子敬

王僧虔雅善隸書宋文帝見其書素扇嘆曰非惟字迹超踰子敬而器雅尤覺過之子敬王獻之字

飛白

飛白者東漢左中郎蔡邕所作靈帝嘉平中詔邕作聖皇篇篇成詣鴻都門上時方修飾鴻都門邕待詔門下見役人以墜帚成字心悅焉歸而為飛白之書歸田錄白通作帛凡飛帛以點畫象物形惟點最難工一說字大而輕微故謂之飛白

題宮

飛白書漢末魏初並以題署宮殿勅法於八分窮微於小篆自非蔡公設妙豈能詣此又王隱王愔並云飛白變楷制也本是宮殿題署勢亦勁大字輕微不漏故名飛白

書寺

梁武帝造寺令蕭子雲飛白大書蕭字至今一字存焉又帝謂子雲曰蔡邕飛而不白羲之白而不飛飛白之

間在卿斟酌耳又張延賞於江南得子雲壁書蕭字一匣以歸洛陽授張諗諗置之修善里結亭號曰蕭齋

屈顧寶先

吳郡顧寶先卓越多奇頗自矜其技能王僧虔乃作飛白書以示之寶先曰下官今為飛白屈矣

賜戴至德

唐高宗為飛白書出賜戴至德曰汎洪流俟舟楫賜郝處俊曰飛九霄假六翮

登牀而得

唐太宗宴玄武門作飛白字賜羣臣或至乘酒爭取於
帝前散騎常侍劉洎登御床引手得之帝笑曰昔聞婕
妤辭醉輦今見常侍登御床故東坡詩遙憐醉常侍一
笑開天容

搢笏以觀

宋范蜀公東齋記嘉祐間上召羣臣天章閣下觀御書
閱御物上親作飛白書令左右搢笏以觀

四字賜蘇易簡

見翰林承旨

二字賜李唐卿

宋仁宗至和中有待詔李唐卿換飛白三百點以進自謂窮盡物象上特為清淨二字以賜之其六點尤奇絕又出三百點之外

榮光屬天


歐陽脩作仁廟飛白書記夫玉韞石而珠藏淵其光氣

常見於外也故山輝如白虹水變為五色者至寶之所
在也今賜書之藏於室也吾知將有望氣者言榮光起
而屬天必賜書之所在也

輕雲蔽月

東坡作文與可飛白贊始予見其詩與文又得見其行
草篆隸也以為止此矣既沒一年而復見其飛白美哉
多乎其盡萬物之態也霏霏乎其若輕雲之蔽月翻翻
乎其若長空之卷旆也猗猗乎其若遊絲之縈柳絮裊

裊乎其若流水之舞荇帶也離離乎其遠而相屬縮縮乎其近而不隘也其工至於如此而予今乃知之則予知與可者固無幾而其所不知者蓋不可勝計也



山堂肆考卷一百三十三

欽定四庫全書

子部

山堂肆考卷一百三十四

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣陸湘

謄錄監生臣周世燦

欽定四庫全書

山堂肆考卷一百三十四 明 彭大翼 撰

謚法

制謚

史記謚者行之迹號者功之表車服者位之章是以
大行受大名細行受細名行出於己名生於人名謂
謚號也

已死定謚

禮檀弓幼名冠字五十以伯仲死謚周道也

將葬制謚

史記謚法解惟周公旦太公望開嗣王業建功牧野終
將葬乃制謚

無爵不謚

禮郊特牲古者生無爵死無謚注云殷以前大夫以上
乃為爵死則為謚周制雖爵及命士死不謚也

暴貴不謚

曲禮君子已孤不更名已孤暴貴不為父作謚

易名

檀弓衛公叔文子卒其子戌請謚於君曰日月有時將
葬矣請所以易其名者君曰昔者衛國凶饑夫子為粥
與國之餓者是不亦惠乎衛國有難夫子以其死衛寡
人不亦貞乎夫子聽衛國之政修其班制以與四鄰交
衛國之社稷不辱不亦文乎故謂夫子貞惠文子

壹惠

禮表記子曰先王謚以尊名節以壹惠恥名之浮于行也注云謚以尊名為美謚以尊顯其聲名也壹專也惠善也善行雖多難以枚舉但節其大者以專其善故曰節以壹惠也

追謚文宣

唐會要開元二十七年追謚孔子為文宣王宋大中祥符五年追謚至聖元加謚大成曰大成至聖文宣王明朝因之至嘉靖間改為先師孔子

加謚昭烈

唐上元元年尊太公望為武成王宋大中祥符元年加謚昭烈武成王

謚父曰成

左文元年楚太子商臣以宮甲圍成王王請食熊蹯而死弗聽丁未王緼謚之曰靈不暝曰成乃暝

謚君為共

左襄十三年楚子疾告大夫曰不穀不德亡師於鄢以

辱社稷為大夫憂若以大夫之靈獲保首領以沒於地
唯是春秋寔宥之事所以從先君於禰廟者請為靈若
厲大夫擇焉既卒子囊謀謚大夫曰君有命矣子囊曰
君命以共若之何毀之赫赫楚國而君臨之撫有蠻夷
奄征南海以屬諸夏而知其過可不謂共乎請謚之共
大夫從之

婦人加謚

穆天子傳盛姬卒謚為淑人加婦人謚始此

太子加謚

晉太子申生卒晉人謚為恭太子謚始此

太后加謚

漢世母后無謚高祖尊先母為昭靈夫人尊高后為昭靈后至明帝葬陰太后始建光烈之稱然猶未以謚名也其後母后止有二謚至宋仁宗時劉太后崩謚莊獻明肅則母加四謚自此始矣

公主賜謚

楊侃職林唐貞元十五年故唐安公主賜謚莊穆則公主謚自此始及考唐高祖女平陽公主起兵叅佐已謚為昭齊高帝女妻沈攸之子文和已謚為興憲則公主賜謚又非自唐安始矣

岐王贈謚

唐岐王範卒玄宗贈謚惠文太子史斷云範乃玄宗之弟而是時官又為太子傅顧以太子謚之顛倒不倫一至於此

寧王追謚

唐宋王名成器後改封寧王名憲開元二十九年薨上
哀惋特甚曰天下兄之天下也固讓於我為皇太伯常
名不足以處之乃謚曰讓皇帝其子汝陽王璿表述先
志固讓不許代宗時又追贈曰齊王

趙成子

晉趙夙生衰衰字子餘謚成衰生盾盾字孟謚宣子豐
舒問于賈季曰衰與盾孰賢對曰衰冬之日也盾夏之

日也

趙文子

趙武盾之孫莊子朔之遺腹子為晉大夫薦白屋之士六十家舉管庫之士七十餘家諡文文子生景叔景叔生簡子鞅

魏莊子

晉魏絳隼之子事晉悼公為正卿言和戎有五利公說鄭人獻女樂公以其樂之半賜之絳于是始有金石之

樂謚莊子莊子子舒謚獻

范文子

晉范文子名士燮武子士會之子謚文鄆陵之戰晉伐鄭荆
救之樂武子欲戰范文子不欲曰唯聖人能無外患又無內
憂距非聖人不有外患必有內憂盍姑釋荆與鄭以為外患
乎文子之子士句謚宣宣子之子士鞅謚獻世為晉上卿

呂武子

晉呂錡謚武錡之子相謚宣悼公即位使宣子佐下軍

曰邲之役呂錡佐知莊子于下軍獲楚公子穀臣與連尹襄老以免子羽鄢之役親射楚王而敗楚師以定晉國而無後其子孫不可不崇也此言呂武子有大功而其子孫無在顯位者故以宣子佐下軍賞其功云

韓宣子

晉韓起謚宣適魯見易象與春秋曰周禮盡在魯矣吾乃今知周公之德與周之所以王也

欒武子

晉樂書謚武成公三年伐齊而歸公勞之對曰士用命也書何力之有焉

卞莊子

莊子魯卞邑大夫性好勇善事母母無恙時三戰而三北及母死三年魯興師莊子請從見將軍曰初與母處是以三北吾甚辱焉今母沒矣請塞責遂赴敵獲一甲首而獻之曰此塞一北又入獲一甲首而獻之曰此塞二北又入獲一甲首而獻之曰此塞三北將軍止之請

為兄弟莊子曰三北以養母也子道也今士節小具而塞責矣吾聞節士不以辱生遂反敵數十人而死謚莊智莊子

晉智季謚莊即荀首也莊子之子智瑩謚武武子之子智盈謚悼世為上卿悼子之子智躒謚文子為下軍佐文子之子智瑤謚襄子是為智伯韓魏趙滅之三分其地

孔文子

左哀十一年衛大叔疾出奔宋初疾娶於宋子朝其娣
嬖子朝出奔孔文子使疾出其妻而妻之疾使侍人誘
其初妻之娣寘於犁而為之一宮如二妻文子怒欲攻
之訪於仲尼仲尼止之遂奪其妻或淫於外州外州人
奪之軒以獻恥是二者故出奔衛人立遺文子使室孔
姑按遺疾之弟孔姑即文子之女疾之妻也文子謚文

孟穆伯

魯桓公之子慶父生公孫敖敖謚穆穆伯生二子曰穀

曰難教聞周内史叔服能相人也見其二子焉叔服曰穀也食子難也收子穀也豐下必有後於魯國按穀即文伯難即惠叔

陳文子

齊陳文子名須無敬仲之後也謚文子左襄二十三年齊莊公將伐晉陳文子見崔武子將若君何武子曰吾言於君君弗聽也以為盟主而利其難羣臣若急君於何有子姑止之文子退告其人曰崔子將死乎謂君甚

而又過之不得其死過君以義猶自抑也況以惡乎齊
侯遂伐晉

臧僖伯

魯孝公子彊食采於臧是為僖伯子孫因以為氏焉僖
彊諡也僖伯諫觀魚事見總諫官

臧哀伯

左桓二年夏四月取郕大鼎於宋納於太廟魯大夫臧
哀伯諫公不聽周内史聞之曰臧孫達其有後於魯乎

君違不忘諫之以德按哀伯名達僖伯之子謚哀哀伯
子伯餅不顯

孟獻子

魯大夫仲孫蔑也謚獻獻子聘於晉宣子觴之三徙鐘
石之懸不移而具獻子曰富哉家宣子曰子之家與我
孰富獻子曰吾甚貧惟有二士顏回茲無靈者使吾邦
家安平百姓和協獻子出宣子曰彼君子也以養賢為
富我鄙人也以鐘石金石為富獻子卒莊子年少嗣立

與季孫宿同朝宿父文子忠於公室宿不能守而改之
莊子獨能不改父之臣與政仲尼所以為難也莊子名
速

孟僖子

左昭七年三月公如楚孟僖子為介不能相儀及楚不
能答郊勞九月公至自楚僖子病不能相禮乃講學之
及其將死召其大夫曰禮人之幹也無禮無以立吾聞
將有達者孔丘聖人之後也而滅於宋其祖弗父何以

有宋而授厲公及正考父佐戴武宣三命茲益共滅孫
紇有言曰聖人有明德者若不當世其後必有達人今
將在孔丘乎我若獲沒必屬說與何忌於夫子使事之
而學禮焉以定其位故孟懿子與南宮敬叔師事仲尼
按孔子殷湯之後故曰聖人之後孔子六代祖孔父嘉
為宋督所殺故曰滅於宋說即南宮敬叔何忌即孟懿
子皆僖子之子也懿子之子名蕤一名洵即孟武伯武
伯之子名捷即孟敬子

臧文仲

文仲名辰伯錡之子謚文哀伯之孫也世為魯大夫莊公十一年宋大水公使弔焉宋公對曰孤實不敬天降之災又以為君憂拜命之辱文仲曰宋其興乎禹湯罪己其興也勃焉桀紂罪人其亡也忽焉二十八年冬饑文仲言於公曰國病矣君盍以名器請糴於齊公曰誰使對曰國有饑饉卿出告糴古之制也辰也備卿請如齊從者曰君不命而請之其為選士乎文仲曰賢者急病

而讓夷我不如齊非急病也在上不恤下居官而惰非
事君也文仲以鬯圭與玉磬如齊齊人歸其玉而與之
雜按文仲子曰宣叔

臧武仲

家語顏回問於孔子曰臧文仲武仲孰賢孔子曰武仲
賢哉顏回曰武仲世稱聖人而身不免於罪是智不足
稱也好言兵討而挫銳於邾是智不足名也夫文仲其
身雖沒而言不朽惡有未賢孔子曰身沒言立所以為

文仲也然猶有不仁者三不智者三是則不及武仲也
回曰可得聞乎孔子曰下展禽置六闕妾織蒲三不仁
設虛器縱逆祀祠海鳥三不智武仲在齊齊將有禍不
受其田以避其難是智之難也夫武仲之智而不容於
魯抑有由焉作不順而施不恕也按武仲不容於魯者
謂其先斬鹿門之闕出奔邾後如防請後既立滅為復
致防而奔齊是也不順不恕者謂季孫宿無嫡子公彌
長而愛悼子欲立之訪於申豐不可而止又訪於武仲

乃為立之是廢長立少豈順事而恕施者乎此事詳見左傳魯襄公二十三年武仲名紇謚武宣叔之子文仲之孫

叔孫穆子

魯桓公子叔牙生茲號叔孫氏其後叔孫得臣叔孫僑如叔孫武叔叔孫輒皆其後也魯卿有叔孫穆子名豹謚穆乃得臣之子號之會諸侯之大夫尋盟未退季武子伐莒取鄆楚人將以叔孫穆子為戮晉樂王鮒求貨

於穆子曰吾為子請於楚穆子不予曰承君命以會大事而國有難我以貨私免是我會吾私也雖可以免吾其若諸侯之事何楚子乃赦之

公孫成子

公孫僑字子產謚成鄭穆公之孫子國之子也晉范宣子為政諸侯之幣重鄭人患之公如晉子產寓書於子西以告宣子曰僑聞君子長國家者非無賄之患而無令名之難諸侯之賄聚於公室則諸侯貳諸侯貳則晉

國壞晉國壞則子之家壞何沒沒也將焉用賄宣子說
乃輕幣

季文子

季孫行父魯桓公第四子季友之孫歷相三君無衣帛
之妾無食粟之馬謚文子文子子宿謚武子武子子紇
謚悼子悼子子意如謚平子平子子斯謚桓子桓子子
肥謚康子世為魯正卿

甯武子

左文四年衛甯武子來聘公與之宴為賦湛露及彤弓
不辭又不答賦使行人私焉對曰昔諸侯朝正於王王
宴樂之於是賦湛露則天子當陽諸侯用命也諸侯敵
王所愾而獻其功王於是賜彤弓一彤矢百鉉弓矢千
以覺報宴今陪臣來繼舊好其敢干大禮以自取戾武
子名俞卒謚武

蕭文終

蕭何豐沛人以刀筆吏事漢高為丞相封酈侯鎮國撫

民為功臣首卒謚文終

張文成

張良字子房其先為韓人道遇沛公遂屬焉運籌決策為帝者師封留侯卒謚文成長子不疑嗣為侯次子辟疆年十五為侍中

曹懿侯

曹參沛人初以中涓從漢祖起兵遂為相國治尚清靜與民休息封平陽侯卒謚懿子窋為中大夫次子時時

子襄皆尚公主

陳獻侯

陳平陽武戶牖鄉人以魏無知薦事漢祖常出奇計以救紛糾之難振國家之患及呂太后崩又能與太尉合謀誅諸呂定社稷為左丞相封曲逆侯卒謚獻子共侯賈嗣立卒子簡侯惲代侯又卒子何代侯坐略人妻棄市國除

周武侯

周勃其先卷人後徙沛以織薄曲為生徙高祖定天下
諸呂欲作亂與陳平合謀卒安劉氏封絳侯食邑八千
二百八十戶文帝立拜丞相卒謚武子勝之代侯六歲
尚公主不相中坐殺人國除絕一歲帝乃擇勃子賢者
河內守亞夫封絳侯續絳侯後

樊武侯

樊噲沛人以屠狗為業徙高祖起豐攻下沛屢著戰守
功鴻門之宴又能擁盾直入脫主於危急存亡之秋封

八百戶賜爵列侯世世勿絕食舞陽又號舞陽侯後高祖病甚或云噲黨於呂氏待上晏駕欲以兵誅趙王如意帝怒遣陳平至軍中斬之以周勃代將其軍平勃二人以噲為帝故人又呂后弟嬃之夫斬之恐後悔因執噲詣長安至則帝已崩呂后釋噲使復爵邑及卒謚武侯

灌懿侯

灌嬰睢陽販繒也初從漢高立戰功號昌武侯食杜平

鄉後與絳侯等共立代王為帝益封三千戶拜太尉繼絳侯為丞相歲餘卒謚懿侯

張文侯

張蒼陽武人秦時為御史主柱下方書後歸漢繼灌嬰為丞相任人為中侯大為奸利文帝讓蒼蒼遂以病免卒謚文侯初蒼父長不滿五尺及蒼長八尺餘蒼子復長八尺孫類長六尺餘坐法失侯

申節侯

申屠嘉梁人初以材官蹶張從高祖擊項籍遷為隊率
後有功代張蒼為丞相為人廉直門不受私謁未幾以
晁錯穿門南出之事未及先請而反為錯所賣遂嘔血
而死謚節侯子共侯茂代卒子侯去病代又卒子侯叟
代坐罪國除

石恬侯

石慶萬石君少子初為齊相舉國皆慕其家行不言而
國大治元狩元年自沛守為太子太傅七歲遷御史大

夫元鼎五年為丞相封牧丘侯後以不能任職乞歸謚
恬侯

霍景桓

霍去病大將軍衛青姊子也年十八為天子侍中善騎
射以斬首虜功封冠軍侯又為驃騎將軍益封萬七千
七百戶卒謚景桓父仲孺異母弟光

霍宣成

霍光字子孟擁昭立宣功在社稷封博陸侯卒謚宣成

子禹

衛烈侯

衛青平陽人其父鄭季為吏給事平陽侯家與侯妾衛媼通而生青青凡七出擊匈奴立大功封長平侯益封八千七百戶三子伉不疑登皆封侯

金敬侯

見賤士

張敬侯

張安世杜陵人湯之子大將軍霍光以安世自武帝時為尚書令志行純篤乃白用為衛將軍兼光祿勳以自副焉封富平侯卒謚敬子三人千秋延壽彭祖也

魏憲侯

魏相字弱翁濟陰定陶人地節中拜相以嚴毅總職甚稱上意與丙吉同心輔政封高平侯卒謚憲

丙定侯

丙吉為人深厚不伐善自曾孫遭遇絕口不道前恩及

為丞相知大體好禮讓即掾吏有罪終無所案封博陽侯卒謚定子顯以有罪削爵孫昌復襲祖爵

鄧元侯

鄧禹南陽人字仲華更始時光武持節河北禹杖策追及于鄴因進延攬英雄之策輔成帝業遂為東京元功拜大司徒封高密侯卒謚元禹內行純備有子十三人各使守一藝修整閨門教養子孫皆可以為後世法

趙壯侯

趙克國字翁孫上邳人沈勇有大畧漢武朝拜車騎將軍元康初年七十餘上屯田十二策平西羌封營平侯卒年八十六謚壯

馮節侯

馮異字公孫佐漢光武中興拜征西將軍賜璽書曰征西功若丘山猶自以為不足孟之反亦何異哉謚節侯

楊文父

處士楊厚新都人少傳父統業東漢順帝時徵至長安

因陳漢三百五十年之厄宜蠲法改憲以消災異累官
侍中拜議郎後稱病歸教授門生三千餘人卒年八十
二鄉人謚曰文父

楊文烈

東漢靈帝中平元年司空楊賜卒初賜既免帝聞故事
得賜與劉陶上張角奏乃封賜臨晉侯至是復以司空
薨謚文烈祖震父秉

王忠侯

漢哀帝託傅太后遺詔益封董賢二千戶丞相新甫侯
王嘉封還詔書極論賢為佞幸之臣不當傾爵位以貴
之損至尊以寵之流聞四方皆同怨疾上怒詔嘉詣獄
遂不食嘔血而死元始中追謚忠

黃忠侯

黃瓊東漢江夏安陸人字世英永建中被徵拜議郎稍
遷尚書僕射數上疏言事與周舉同時輔政名重朝廷
封祁鄉侯卒謚忠

謚文範

陳實字仲弓東漢桓帝時為太丘長修德清靜民賴以
安卒謚文範先生

謚忠武

諸葛亮字孔明琅琊人寓居南陽隆中漢建安中徐庶
稱為臥龍先主三顧草廬而後起佐備跨有益州策為
丞相撫百姓示儀軌約官職從權制開誠心布公道集
衆思廣忠益誠識治之良才也封武鄉侯謚忠武子瞻

以戰死

關忠義

蜀關公字雲長斬顏良降于禁威震華夏拜前將軍封壽亭侯假節鉞稱萬人敵為世虎臣卒謚忠義

張桓侯

蜀張飛字翼德雄壯威猛義釋嚴顏有國士風拜右將軍封西鄉侯卒謚桓

羊成侯

羊祜字叔子泰山平陽人續之孫蔡邕之外孫晉武帝時鎮襄陽綏懷遠近甚得江漢之心在軍中輕裘緩帶身不被甲鈴閣之下侍衛不過十數人加征南大將軍鉅平侯卒謚曰成

傅剛侯

傅玄字休奕晉武帝時為司隸校尉每有奏劾或值日暮捧白簡整簪帶踈踊不寐坐而待旦貴游震懾臺閣生風封清泉侯卒謚剛

何孝公

何曾字穎考夔之子陽夏人厚自奉養過於人主及卒博士秦秀謹按謚法宜謚繆醜晉主策謚曰孝按曾好學博聞性至孝自少至老夫婦相見如賓無聲色嬖倖之好入晉累官太宰侍中然性豪奢帷帳車服窮極綺麗厨膳滋味過於王者每燕見不食太官所設帝命取其食視之蒸餅上不坼作十字不食

賈武公

賈克字公問老病自憂謚傳從子模曰是非久自見不可掩也晉泰康中卒博士秦秀以其奸回弑逆請謚以荒帝更曰武

卞忠貞

卞壹濟陰宛句人字望之父粹字玄仁兄弟六人並登宰輔世稱卞氏六龍壹弱冠有名官至尚書令與庾亮同心輔政及蘇峻犯順壹背癰新愈力疾苦戰而死二子矜盱相隨赴賊同時遇害其母撫尸哭曰父為忠臣

子為孝子夫何恨乎峻平追贈侍中謚忠貞

何忠肅

何無忌晉東海郟人為太學博士後為廣武將軍桓玄篡位與劉裕等起義兵戰走桓玄以功封安成郡開國公後與盧循戰失利握節而死謚忠肅

劉元公

晉劉弘字和季有幹畧為荊州都督封新城公卒謚元

陶桓公

陶侃字士行三國吳武威將軍丹之子晉明帝太寧中
都督荆襄等州軍事成帝咸和中拜太尉封長沙公晚
年深以盈滿自懼不預朝權至是疾篤上表遜位歸長
沙薨謚曰桓侃在軍四十一年明毅善斷識察纖密人
不能欺自南陵至白帝數千里中路不拾遺次子瞻瞻
子宏宏子綽綽子延壽嗣為長沙公

王文獻

王導字茂弘覽之孫少有鑒識佐晉元帝中興號為仲

父永寧初進位太保封始興郡公卒謚文獻六子悅怡洽協邵蒼

謝文靖

謝安字安石少有重名寓居會稽以山水文籍自娛晉穆帝昇平中桓溫請為征西司馬孝武寧康中總中書會符堅入寇舉姪玄為將卒成淮淝之捷太元中錄尚書事加太保封建昌公謚文靖兄奕弟萬子琰

王宣簡

王肅字子雍北魏臨沂人涉獵經史頗有大志初仕南齊奔魏除輔國大將軍屢立戰功遷揚州刺史清身好施家無餘財封安國侯謚宣簡

蔡宣穆

蔡興宗劉宋考城人廓子為僕射初子業之世表顗求出為雍州刺史興宗顗舅也時以為荊州長史辭不行顗曰朝廷形勢人所共見在內大臣朝不謀夕興宗曰汝欲在外求全我欲居中免禍及子業被弑子勛舉兵

潯陽明帝平之其懼禍遠出者流離外難百不一存衆
乃服興宗之先見謚宣穆

高文公

北魏高允雖處貴重情同寒素執書吟覽晝夜不去手
卒年九十八封咸陽公贈司空謚曰文

韋嚴公

時梁主方崇釋氏士民無不從風而靡獨車駟將軍韋
叡自以位居大臣不欲與俗俯仰所行畧如平日封永

昌侯卒謚嚴

王文憲

王儉字仲寶袁粲曰此兒雖小已有棟梁之器仕齊領吏部封南昌公及卒禮官欲謚文獻王晏與儉不平啟上曰此謚自宋以來不加異姓因改謚憲

王文中

王通龍門人字仲淹西遊長安見隋文帝於太極殿奏太平十二策不報退居河汾教授生徒大業末卒於家

門人謚曰文中子弟凝字叔恬子二福郊福時孫三勔勔勃

虞文懿

虞世南字伯施越州人外謹儒而中抗烈與兄世基同受學於吳興顧野王唐太宗朝為弘文館學士後以銀青光祿致仕封永興公謚文懿

趙昭夷

唐趙元亮字貞固少負志畧如隱者之操及卒其友魏

元忠宋之間崔璩等謚曰昭夷先生

魏文貞

魏徵字玄成唐貞觀初拜諫議大夫上或引至臥內訪以天下事徵乃展盡底蘊凡二百餘奏無不剴切當帝心柳芳以為三代遺直進守祕書監叅預朝政封鄭公謚文貞四子叔玉叔琬叔璘叔瑜

高文獻

高儉字士廉以字顯少敏慧隋薛道衡等皆與為忘年

交貞觀中拜右僕射封申公卒謚文獻六子惟履行審
行真行為有名

李貞公

唐初李綱以尚書領太子詹事屢諫建成昵近小人不
聽乃乞骸骨唐主曰知公直士勉留輔吾兒以為太子
少保貞觀中進位太子少師封新昌公卒謚貞

杜襄公

杜如晦字克明少英邁負大節高孝基謂其當為棟梁

用房玄齡謂為王佐才太宗即位進右僕射與玄齡共
管朝政房善謀杜善斷故唐世稱賢相者必曰房杜如
晦封萊國公卒謚襄子觀荷俱貶死弟楚客位工部尚
書

王懿公

王珪字叔玠唐太宗朝為諫議大夫嘗令品藻人物當
時以為確論封永寧公卒謚懿

李懿公

李大亮恭儉忠謹每宿直必坐寐達旦房玄齡稱其有
王陵周勃之節封武陽公後副玄齡守京師卒遺表請
罷高麗之師家止遺米五斛布三十匹而已謚懿公

房文昭

房玄齡字喬幼警敏年十八舉進士高孝基見之謂為
國器貞觀初與杜如晦同為僕射明達吏事輔以文學
引拔士類常如不及加太子少師封梁公謚文昭子遺
直遺愛皆不才

尉忠武

尉遲恭字敬德以字顯唐武德初秦王引為右府參軍
論功為第一封吳國公改封鄂國公晚年閒居學延年
術不交通賓客凡十六年謚忠武

裴憲公

裴行儉字守約唐高宗時為吏部侍郎與李敬玄馬載
同典選時稱裴馬有知人之鑑封聞喜公謚憲子先庭
開元中拜相

婁貞公

婁師德周武后時同平章事沈厚寬恕犯而不校又能
知人密薦仁傑雖謂盛德長者可也及其出將河隴前
後凡四十餘年恭勤不怠民夷安之況當羅織紛紜之
時而師德久為將相獨能以功名令終其過人也遠矣
卒謚貞

李景武

李靖字藥師京兆人姿貌魁奇嘗謂所親曰大丈夫當

以功名取富貴何至作章句儒耶其舅韓擒虎謂其可
與語孫吳牛弘謂其有王佐才唐貞觀中出將入相封
衛國公謚景武

狄文惠

狄仁傑字懷英唐高宗嗣聖中以冬官侍郎同平章事
所薦張柬之五人皆為名臣又能蒙恥奮忠每以母子
天性之說感悟武氏紓徐不迫竟成反周為唐之功卒
謚文惠睿宗即位追封梁國公子光遠光嗣又一子景

暉不肖

姚文獻

姚崇字元之少倜儻尚氣節唐玄宗開元初拜相兼兵部尚書緣邊屯戍斥堠士馬儲械無不默記上勵精為治每事訪之應答如響卒謚文獻三子彝奕异皆至卿位

宋文貞

宋璟耿介有大節唐開元中姚崇因主書趙誨受賂事

覺請遜位薦廣州都督宋璟自代由是璟與張說源乾
曜同日拜相崇善應變成務璟善守法持正二人志操
不同然協心輔理使賦役寬平刑罰清省百姓富庶唐世
賢相前稱房杜後稱姚宋他人莫得比焉璟封廣平公
卒謚文貞五子見子類

李貞武

李世勣字懋功貞觀中拜并州都督在州十六年邊陲
晏然帝曰我用勣守并州賢於長城遠矣封英國公謚

貞武

蕭貞褊

蕭瑀本後梁明帝之子好經術歸唐封宋國公太宗以其武德之季有讜言賜以疾風勁草之詩拜太子太保同三品及卒太常議謚曰德尚書議曰肅太宗改謚貞褊以其性忌也

敬宗謚終

許敬宗在唐奸回取容忍心害理嘗奏流其子於嶺南

以女嫁蠻酋多納其貨又誣奏長孫無忌謀反逼令自
縊及卒太常博士袁思古按謚法名與實爽曰繆請以
謚之敬宗孫彥伯訟請改謚博士王福時曰何曾既忠
且孝徒以日食萬錢得謚為繆敬宗忠孝不逮於曾而
飲食男女之累過之謚之曰繆無負許公矣詔五品以
上更議禮部尚書楊思敬曰過而能改曰恭請謚曰恭
詔從之

光庭謚克

裴光庭字連城唐開元中為吏部尚書用人多循資格失勸獎之道及卒博士孫琬請謚曰克其子訟之賜謚忠獻

張文獻

張九齡字子壽唐開元賢相也封始興公千秋節王公皆獻寶鏡九齡獨進事鑑十章號千秋金鑑錄後為李林甫中傷且忤上旨罷為荊州長史然帝素愛重其人每宰相薦士必問曰風度得如九齡不乎卒謚文獻弟九

皋九章子極玄孫仲方

顏忠節

顏杲卿真卿從兄也唐天寶末為常山太守安祿山反
城陷被執罵賊而死楊國忠用張幽通譖竟無褒贈真
卿泣訴於上杖殺通幽贈杲卿太子太保謚忠節其子
泉明為史思明所虜後得歸求父屍於東京得之

蘇文憲

蘇頲字廷碩瓌之子武后朝遷監察御史中書舍人玄

宗愛其文起為工部侍郎遂拜相襲父爵封許國公謚
文憲

張文貞

張說字道濟洛陽人垂拱中策賢良方正說所對第一
遷補闕中宗立遷工部侍郎睿宗推中書侍郎玄宗為
太子時說為侍讀踰年進同平章事玄宗即位以誅太
平公主之亂召為中書令封燕國公後為林甫詆毀命
致仕遷左丞相卒謚文貞

顏文忠

顏真卿字清臣天寶中為平原太守祿山反倡義討賊
封魯公德宗時奉詔宣慰李希烈為賊縕殺之貞元中
追贈司徒謚文忠兄春卿子頤願

李武穆

李光弼肅宗朝拜節度使平安史亂與郭子儀齊名世
稱中興戰功第一治軍嚴重謀定後戰指顧號令諸將
莫敢仰視代宗朝封臨淮郡王詔賜鐵券卒謚武穆

郭忠武

郭子儀唐肅代朝平安史亂功居人臣第一天下以其
身為安危者殆二十年校中書令考凡二十四德宗朝
賜號尚父封汾陽郡王年八十五薨謚忠武子八人見
子

段忠烈

段秀實字成公卞陽人唐建中初召為司農卿朱泚反
遣銳師襲奉天秀實倒用司農印追其兵而還泚召源

休姚令言及秀實等議稱帝事秀實起奪休象笏前唾
泚面大罵以笏擊泚中其額濺血灑地秀實曰我不從
汝反何不殺我衆爭殺之興元初詔贈太尉謚忠烈子
伯倫為觀察使

李忠武

李晟字良器唐建中初平朱泚亂上迎勞之曰天生李
晟為社稷計非為朕也拜司徒兼中書令封西平郡王
卒謚忠武子愬愿憲

渾忠武

李晟破賊時咸寧王渾瑊亦進取咸陽其功固不相下
故其卒與晟同謚忠武

賈定公

賈至字幼鄰洛陽人曾之子官至中書舍人贈禮部尚
書謚曰定

崔孝公

崔沔字善冲京兆人山東刺史謚孝

馬莊武

馬燧字洵美唐大厯建中間屢立大功進封北平郡王
卒謚莊武子暢位至少傅孫繼祖殿中少監

韋忠武

韋皋字城武唐貞元初代張延賞為劍南西川節度使
招徠雲南大破吐蕃進封南康郡王帝製紀功碑褒賜
之卒謚忠武

陸宣公

陸贄字敬輿唐德宗召拜翰林學士居中叅議可否時
號內相每有諫諍或規其太過答曰吾上不負天子下
不負所學貞元中拜相卒謚宣公

韓文公

韓愈字退之以六經之文為諸儒倡學者仰之如泰山
北斗德宗朝為監察御史以論宮市貶憲宗朝遷刑部
侍郎以論佛骨貶潮州又移袁州召拜祭酒封昌黎伯
卒謚文公子昶

裴文忠

裴度字中立唐憲宗元和中拜相號曲江公既平吳元
濟賜爵晉國公貌不踰中人而威望遠達以身繫國家
輕重如郭子儀者二十餘年卒謚文忠子識大理卿諡
為學士

蕭文元

蕭穎士字茂挺唐開元中舉進士對策第一尹徵王恒
盧異等執弟子禮受業門下號蕭夫子與李華齊名及

卒門人共謚曰文元先生

白文公

白居易字樂天其先大原人後徙華州官至刑部尚書
工文章敏悟絕人素善李紳而不入李德裕之黨素善
牛僧孺楊虞卿而不入李宗閔之黨素善劉禹錫而不
入伍文之黨中立不倚峻節凜然於八木之中而自比
於桂殆未為過也卒贈右僕射謚曰文子龜年小字阿
崔

高忠公

高適字達夫一字仲武唐滄洲人工於詩官至散騎常侍封勃海公謚忠

宋敬公

唐宋慶禮卒太常以其奸巧自是謚曰專禮部負外張九齡駁之曰慶禮在邊陲二十年邊亭晏然不當加以醜謚改曰敬

杜宣公

杜黃裳字遵素有經濟大畧而不修小節元和初拜相
封邠國公卒謚宣

崔成公

唐崔翹齊州人開元初為禮部尚書贈荊州大都督謚
曰成父融為國子司業謚曰文

權文公

唐權德輿字載之洛陽人未冠以文章稱諸儒間德宗
召為左補闕元和中平章事卒謚文父皋字子由在祿

山幕府度其必反逸去上召拜中書舍人不就名入卓
行傳子璩監察御史

楊文簡

唐楊綰字公權尚清儉大歷中拜相制下之日朝野相
賀謚文簡

李忠懿

李愬并州人舉明經高第唐天寶初除清河守改東京
留守祿山陷城被執遇害詔贈司徒謚忠懿

魏忠公

魏知古深州人性方直擢進士拜黃門侍郎先天二年
為侍中從獵渭川獻詩以諷封梁國公後與姚崇不協
罷政事開元三年卒宋璟嘆曰叔向古遺直子產古遺
愛兼之者其魏公乎謚曰忠

李貞公

李乂字尚真趙州房子人少孤年十二工屬文第進士
累萬年尉擢監察御史景龍中遷中舍修文館學士仍

知制誥改黃門侍郎封中山郡公開元初為侍中未幾為刑部尚書卒謚貞贈黃門監

徐文公

徐堅字元固武后時舉秀才及第聖歷中楊再思引為判官與張說同修三教珠英卒謚曰文

崔孝公

崔沔字善冲京兆人事親孝武后時擢進士岑義薦為左補闕性舒遲進止雍如當官正言自持儉約開元初

與王丘等出為山東刺史卒諡曰孝丘字仲山十一歲擢童子科後魏元忠薦之擢御史開元初遷考功員外郎轉吏部侍郎出為郡守復為禮部尚書致仕天寶初卒諡曰文

張成肅

張嘉貞蒲州人武后時拜監察御史歷梁秦二州都督玄宗召回後為中書侍郎同平章事諡成肅

方玄英

方干字雄飛新定人以唇缺有司不與科名咸通中隱
鑑湖時號處士嘗謁廉倖誤三拜人稱方三拜將薦之
而卒門人謚曰玄英先生


孟貞曜

孟郊字東野少隱嵩山貧居苦吟五十第進士調溧陽
尉鄭餘慶鎮興元奏為叅謀卒謚貞曜

敬肅愍

敬暉字仲暉唐聖歷初為衛州刺史後以誅二張功封

平陽郡王謚肅愍



山堂肆考卷一百三十四